

**Kalaallit Nunaanni pinerluuteqarsimasut singernermikkut nalunaarsuuteqarlutik angerlarsimaffimmi pineqaatissinneqarsinnaalernissaat anguniarlugu, Naalakkersuisut Justitsministerimut attaveqaqqullugit peqquneqarnissaannik Inatsisartut aalajangiiffigisassaattut siunnersuut**

(Inatsisartunut ilaasortat Doris Jakobsen aamma Kristian Jeremiassen, Siumut)

**Akissuteqaat**

(Nunamut Namminermut, Pinngortitamut Avatangiisinullu Naalakkersuisoq)

**Siullermeerneqarnera**

Pinerluuteqaqqaqeratarsinnaanerup pinaveersaartinneqarnera sapinngisamik annertunerpaamik iliuseqarfigineqarnissaanik siunnersuuteqartut tunngaveqarnerat Naalakkersuisut isumaqatigaat. Peqatigisaaanik pingaaruteqarluinnarpoq pineqaatissinneqarsimasut inissiisarfinnut inissinneqarnissaanut utaqqitineqartut ikilisinneqarnissaat pillugit suliniutit ingerlaavartuujuarnissaat.

Taamaattumik Naalakkersuisut iluarisimaarpaat Kangerlussuarmi inissiisarfiup ammaqqinneqarnissaa nunatsinniit sunniuteqarluarnikkut iluatsimmat.

Taamaakkaluartorli utaqqisuutigineqartut taamma amerlatigijuarnerat akuerineqarsinnaanngilaq tassungalu atatillugu nalunaarsuissutit singernermut ikkuttakkat atorlugit pineqaatissiissutigineqartup naammassineqarsinnaanera utaqqisuutigineqartut amerlasusiiinut ajunngitsumik sunniuteqassinnaasorinarpoq.

Nalunaarsuissutit singernermut ikkuttakkat nunani amerlasuuni pillaatip angerlarsimaffinni naammassiniarneqarneranut atasumik atorneqarput, taakkulu assinganik Kalaallit Nunatsinni atorneqarnissaanut akornutaasinnaasunik peqarsorinangilaq.

Danmarkimi aaqqissuussineq atorneqartoq Pinerluttunik Isumaginnittunit aqunneqarpoq.

Danskit aaqqissuussineranni periarfissaqarpoq suliffeqaannarsinnaaneq imaluunniit ilinniarnepup ingerlatiinnarneqarnissaanut kisianni peqatigisaanik eqqartuussaasimasoq piffissami aalajangersimasumi angerlarsimaffimminiittussaataavoq.

Tassunga atatillugu Naalakkersuisut innersuussutigissavaat Inatsisartunut ilaasortap Astrid Fleischer Rex-ip, Demokraatit, 2007-imi apeqqutaanut Justitsministerip akissutaa, akissutigineqarmat eqqartuussiveqarneq pillugu isumalioqatigiissitat ataatsimoortumik nalileereernermikkut ilaatigut pissutsit taakkartorneqartut tunngavigalugit Kalaallit Nunaanni angerlarsimalluni elektronik atorlugi nakkutigisaasarnepup atuutilersinnissaa ilalernangitsoq, kisiannili teknikkikkut aningaasaqarnikkullu tunngavigisat allanngorneri aallaavigalugit pineqaatissiissutitut atorneqarsinnaanerat itigartitsissutigiumanagu.

Justitministeri akissuteqaammi allappoq, eqqartuussiveqarneq pillugu iluarsartuusseqqinnermut peqatigitillugu aammattaq Kalaallit Nunaanni Eqqartuussiveqarneq pillugu Siunnersuisoqatigiit pilersinneqassasut taakkulu ilaatigut suliassarissagaat eqqartuussiveqarneq pillugu iluarsartuusseqqinnerup malinnaaffigineqarnissaa, kiisalu

kingusinerusukkut patsisissaqassappat elektronik atorlugu angerlarsimalluni nakkutigineqartarneq pillugu apeqquut siunnersuisoqatigiit isummerfigeqqinneqarsinnaasoq.

Kalaallit Nunatsinni aaqqissuussinerup atuutilersinneqannginerani pingaaruteqarpoq paasilluassallugu aaqqissuussinermit inuit peqataatineqartussat kikkunissaat.

Matumani qanoq sivilutigisumik sunillu pineqaatissinneqarsimaneq kiisalu pinerluuteqarnerit suut eqqartuussaassutigineqarsimanersut ilanngullugit isumaliutigineqartariaqarput.

Tassunga atatillugu pingaaruteqarpoq malugissallugu nalunaarsuissutit singernermit ikkuttakkat atorneqalernerisa nassatarisussaammagu, pinerluttuliorfigineqartup pinerluttuliorortoq aqqusinermit naaperatarsinnaassammagu, taamaattumik innuttaasut inatsisinik illersorneqartutut misigisimanerat aamma matumani mianerineqarnissaa pingaaruteqarpoq.

Peqatigisaanik pissutsit suliassanut teknikkimullu tunngasut misissoqqaarneqartariaqarput qulaajarlugillu ilumut aaqqissuussineq taamaattoq atuutilersinneqarsinnaanersoq. Pingaartumik matumani pineqarput aaqqissuussinerup allaffissornikkut aqunneqarsinnaanera aamma eqqartuunneqarsimasunik nakkutilliinermut tunngasut.

Danskit Justitsministerianik siornatigut Naalakkersuisut ataatsimeeqateqarneranni pineqartoq oqaloqatigiissutigineqarpoq, taamaattumillu siunnersuut pitsaasumik tapersersortariaqartutullu isigineqarluni.